

文  
762  
912  
:4  
部二



中国国家图书馆  
NATIONAL LIBRARY OF CHINA

師竹廬聯話卷八

錫山拙翁竇鎮編輯

會館

湖北黃石港有吳越公所係旌德徽州上元南昌南豐公共之會館也汪君肖周題偶語云遊目俯大江數叢沙草羣鷗散舉頭望明月一夜鄉心五處同集唐人詩句脫口而成雲南湖廣會館懸聯云故國人來問流水桃花無恙大觀樓近輟岳陽黃鶴何如惜未詳作者姓名蘇州盤門內新橋巷浙紹會館俞蔭甫編修爲題二聯一係游宦到金閨把越酒話鄉關如讀會稽三賦清時調玉燭借蘇臺成雅集勝在永和九年此懸客坐者一係高會卽蘭亭



中国国家图书馆  
NATIONAL LIBRARY OF CHINA

敘暢詠幽情更饒絲竹興新聲徵菊部對蘇臺風月應憶鏡湖遊  
此於戲臺上見之

杭州有安徽會館柱聯曰游宦到錢塘飲水思源喜兩浙東西與  
歙浦江流相接鍾靈自灤嶽登高望遠問雙峰南北比皖公山色  
何如未知作者是誰想是徽人耳蘇州新修安徽公所其中奉包  
孝肅朱文公栗主潘玉泉方伯於戲臺撰偶句云菊部小排當聽  
他絳樹新歌好博河清同一笑梓鄉衆耆舊來自紫陽故里試將  
風景認三吳上聯末句切孝肅下聯切文公蘇州積功堂乃掩骼  
埋胔之公所司事者乞俞某撰句懸於楹云積累譬爲山得寸則  
寸得尺則尺功脩無倖獲種豆是豆種瓜是瓜勉人積善其意甚  
深吾邑華少坪先生育嬰堂聯云彼離父母欲求生飢寒可憫我  
有兒孫皆怕死慈愛宜推確是仁人之言

曾相國於同治甲子克復金陵後創建湖南會館工竣時卽題楹  
聯曰地仍虎踞龍蟠洗滌江山重開賓館人似澧蘭沅芷招邀賢  
俊同話鄉關又作戲臺聯曰荆楚九歌客中聊作枌榆社江山六  
代劫後重聞雅頌聲吳中八旂奉直公所其大廳中間懸楹帖云  
勝蹟冠吳中有梅村詩句衡山畫圖坐對茶花思往事名流來日  
下是豐沛故家金張貴姓好憑酒盞話昇平此卽拙政園舊址固  
三吳勝地也

江甯府城中湖南會館落成彭雪琴宮保著楹帖云洞庭八百里

浩淼烟波直下大江觴詠齊思建業水衡嶽七二峯葱蘢佳氣挺  
生名世樓臺重啟秣陵春又聯云入門盡是鄉音彼此天涯同作  
客適館欣依夏屋清涼山色解迎人又戲臺聯云六代名都絲竹  
猶聞清夜月三閭遺韻風騷應識故鄉音維揚會館李笠翁撰  
語云一般作客誰無故土之思常來此地會會同鄉也當買舟歸  
澱水千里經商總爲謀生之計他日還家人人滿載不虛跨鶴上  
揚州某地公所儀徵陳六舟中丞題聯云得地九衢中到此應知  
故鄉事成陰十年後可能還憶種花人同治間殷秋樵比部拓西  
院相與佈置竹石花木因成是聯

武昌湖南會館高可瞰江勝地也某君於大門題大江東去吾道  
南來一聯李篁仙撰楹帖云將相功名開湘楚數千年未有之局  
衣冠人物泛洞庭八百里交會而來北京常昭會館門懸年歲常  
熟黼黻昭文之句陝西山東館門懸聖賢桑梓海岱人文之句王  
湘綺代莫提督作偶語於成都湖南館云少年裘馬錦江游喜整  
頓重來秋稻屢豐兵氣靜高會簪纓華屋敞願英賢繼迹甘棠留  
蔭後人看王君又題南昌湖南館云宅枕龍沙看表裏川原曾是  
湘人辛苦地門盈駟馬喜從容尊俎幸逢江介宴安時又題衡州  
江南公所曰湘水東流想金陵龍虎遙蟠共向郵亭望遠雁峯南  
館看石鼓江山如畫長依侯計籌邊江南湘軍公所戲臺徐定生  
題偶句云簫管奏昇平依然盛世元音譜成韶濩鼓鼙思將帥憶

否當年血戰保此金湯京師廣州公所戴文誠公題聯曰近依輦  
轂光儀雅集定多蓬島客話到鄉園風味選詞應譜荔支香

蘇州湖南會館王益吾學政集陸放翁句作偶語云寶館喜重逢  
同上吳城看落日鄉關渺何處却尋衡岳望歸雲濟南八旂公所  
懸聯云國家長白發祥億萬年姬舄姜瓖豐鎬衣冠輝帝里海岱  
維青作鎮百七邑齊風魯頌聖賢桑梓說宗邦南通州公所在京  
都宣武門沈君岐題聯曰旅廬迺構於京喜戴斗瞻天鳥奕簪纓  
朝北闕文章莫大乎是快騰蛟起鳳聯翩科第冠南州湖南省城  
金陵公所大廳懸楹帖云入門一笑是幾時萍水相逢願鴻爪少  
留看三十六灣秋月來日大難問別後梅花誰寄望魚書早達趁

二千餘里春潮此李篁仙手筆

川人商於津口鎮者建會館晴川閣畔鄴都王桂珊爲撰楹帖云  
芳草綠平隄往事閒評鸚鵡賦好山青到蜀相思遙寄杜鵑聲京  
師四川館懸聯云我從巴蜀而來回首劍閣夔門山川形勢甲天  
下書讀漢唐以上抗懷張仲吉甫孝友文章啟後人瀘州石陽公  
所懸楹聯曰心流巴月蜀山以外家在青螺白鷺之間衡州長沙  
館戲臺王湘綺題偶語云東館接朱陵好與長沙回舞鶴南山籠  
紫蓋共聽仙樂奏雲門吾邑北門外錢業公所供端木夫子木位  
龕懸偶句云性道文章爲一代聖門高弟貨財生殖開累朝商務  
先聲時單翁蓉坡爲錢業領袖與同志數人籌資築公所屋數楹

并乞許伯謙茂才紹淵撰此聯句

江南山東會館懸聯云齊魯集英才但攜泰岱雲來得志願爲天  
下雨秦淮臨勝地如泛明湖月去異鄉頗有濟南風北京龍溪會  
館莆田陳海坪先生作偶語云海濱人至談鄒魯天上春來似畫  
圖廣州湖南會館譚鍾麟撰楹帖云粵壤接衡郴風景不殊好徵  
荆楚歲時記宦游來嶺嶠雲山在望常念梓桑恭敬詩又張百揆  
撰聯曰衡湘連五嶺雄封望遠懷鄉好其傳書寄歸雁交廣控百  
蠻重鎮感時撫事便忠飲酒讀離騷又某君題聯曰五嶺聚萍蹤  
沅芷澧蘭列坐恍如香國會三湘聯梓誼玉山珠海相逢莫作異  
鄉看又有聯云游嶺嶠廿年喜此地堂構重新好話家山風景溯  
湘灘一派願吾鄉英賢蔚起共廻天海狂瀾俱有意趣

漢口長沙郡館樓李篁仙撰楹帖云麓山之巔湘水之濱攜劍倚  
蒼茫數前朝梅將功名蔣侯威望武昌以西漢陽以北憑欄瞰風  
物想故國定王臺榭賈傅祠堂山西湖南會館何林亭作偶語懸  
於其客廳句云同是宦游人三晉雲山權作主應知故鄉事重湖  
風月近何如又李篁仙題楹聯云霜威出塞雲色渡河李太白詠  
三晉遺風今日猶如昔日否漢口夕陽洞庭秋水劉長卿寫兩湖  
好景此鄉得似故鄉無津市昭武會館客廳懸果園羣木綠浮几  
津市晚燈紅到門之聯又吳某題聯曰廣義稱澧公園亞土熙熙  
見歐俗合羣譬衣帶水洞庭浩浩接鄱陽此館與津市隔澧相望



其西有果園羣木潏鬱雨過如沐明華陽王別業也

北京菜市口揚州會館儀徵阮文達公元題偶語云二千里遙引  
江淮凡甲乙科同在中朝皆敦鄉誼尺五天近臨章杜嚮己未歲  
重新上館更啟人文此爲江都甘泉儀徵三邑旅京士子所居故  
稱揚州上館後因高郵寶應諸邑頗有違言遂改上館爲老館而  
別建新公所於珠巢街云某處有湖南公所其客廳懸洲邊草綠  
江上峯青及大厦終須要樑棟故鄉無此好湖山兩聯又懸楹帖  
云拔磊落奇才是海岱松是荊州柏住湖山佳處可太白酒可伯  
牙琴俱新化周芍衫所題

星沙會館在儀徵南門外屋宇華麗中有龍王殿某君題聯曰爲  
龍爲光其德不爽如江如漢降福孔皆石江公所有周芍衫撰楹  
帖云公爾忘私異日宰天下當如是矣所學何事抗心希古人庶  
幾近之立意足以警世某處山東公所楊齋甫作偶語云車服在  
廟堂梓敬桑恭此卽昌平鄆氏邑聖神際天地管窺蠡測我亦達  
巷黨中人京師安徽會館戲臺有聯曰安廬鳳穎嶽甯池太滌和  
廣六泗八府五州良士于于來日下金石絲竹匏土革木宮商角  
徵羽五音六律新聲嫋嫋入雲中邗江湖南館其戲臺懸聯云二  
分明月正當頭喜寰宇澄清好將金管玉簫唱西江月千里暮雲  
同想像對樓臺歌舞恍見珠簾畫棟飛南浦雲漢中湖廣公所戲  
臺楊齋甫撰聯云大夏渺遺音聽他秦筑秦箏今樂何如占樂天

涯聯舊侶爲我楚歌楚舞他鄉也似故鄉

濟南府江南會館後有老屋數楹凡旅櫬之未歸者皆殯焉武進汪叔明司馬昉撰楹帖云生亦云勞幾輩能酬胸坎志死猶作客何時得遂首邱心見者悽惻鎮江近山門外江西會館懸偶語云坐中都是故鄉人喜一榻茶煙好同詢南浦朝雲西山暮雨江畔別開名勝地近二分明月試憑眺東流雪浪北固煙霞滬上四明公所懸楹聯曰相逢多故里親交試話明山月色甬水潮聲無客不思家歸夢遠馳三百里到此覽神州氣象但看戰艦東來賈舶西去匹夫皆有責舊邦毋忘四千年上言愛鄉下言愛國設非血性人必不能吐此忠愛之言

京都南通州會館爲春秋兩試士人息肩之所光緒丙申鳩貲重葺屋宇顧君曾烜之子儒基時官內閣實典斯役及落成顧君撰楹帖云惟淮海偏州逕隸行省與附庸舊縣別開邸舍於茲脊彼征人命憐獻佶入息騰躡出鳴佩珂去輿潔卑辱而得升朝千里因依欣聚首繁鄉邦後進來遊上京卽布衣諸生皆具風雲之氣譽斯髦士應科厯官內躋臺司外秉璽寄自俶落權輿以迄吾世百年廣續話從頭北京常昭會館內有敦睦堂柱懸偶語云常建詩名興福寺昭明遺蹟讀書臺杭城旅館內正廳懸聯云客來不速賓至如歸語殊渾成揚州公所中戲臺有楹聯云想當年那段情由未必如此看今日這般光景或者有之虛字傳神何其妙也



惠麓南北貨業公所懸聯云故域屬揚州廣收九市精華山珍靈  
萃海錯星羅不僅橘苞傳錫貢名區占惠麓休負二泉勝概挈楫  
春初題襟秋晚最宜桑梓共聯歡係南貨業人屬曹衡之茂才撰  
亦覺暢達有味

師竹廬聯話卷八終

師竹廬聯話卷九

錫山拙翁寶鎮編輯

佳話

桐城張文和公七十壽辰純皇帝賜以聯曰潞國晚年猶嬰鑠呂  
端大事不糊塗合肥李小荃制軍五十壽楚中僚屬楹語雖多愜  
意者甚少惟浙撫楊石泉中丞昌濬一聯獨邀贊賞句云有開必  
先領袖一門將相伴壽而艾儀型半壁東南簡而該切而脫佳製  
也吾鄉顧存之封翁九十壽丁植卿孝廉撰句祝曰身閱五朝范  
文正睦姻任恤天遺一老衛武公毫毫康強筆意倜儻楊明經岳  
秋先生祝辭云五代慶麟祥恰好一堂開壽宇十年添鶴算再看



百歲建崇坊末句指封翁居百歲坊巷汪葆素茂才有聯云身歷  
五朝老來尤健巷名百歲壽者所居又代友作云文武一門功名  
富貴衣冠百代子孫曾元顧峻夫明經亦撰句以祝云高誼薄風  
雲活族施貧千畝膏腴蠲鶴俸大年登耄臺躋堂介壽五傳人物  
衍麟祥上聯末句因封翁創建義莊而言也

瑞安孫琴西觀察衣言著遜學齋詩稿行世琉球國人以善價購  
之同治戊辰需次江甯適曾文正公移任直隸贈楹語曰大筆高  
名海內外君來我去天東南意包括而句健江陰何蓮舫太守杖  
以詩名海內著有悔餘菴稿行世同治初年棄官而商家揚州築  
山鑿池日以琴書自樂文正贈聯云千頃太湖鷗與陶朱同泛宅  
二分明月鶴隨何遜共移家工於運典瀟灑風流洵堪傳世

宜興布衣徐慎獨字迂伯儻有大志事親孝尤留心經世之學  
因道光辛丑壬寅間海疆事棘作平夷策六篇及治安十策詣闕  
上之時曾文正國藩官翰林聞而訪之則將歸矣書海內奇男子  
江南大布衣楹帖贈行咸豐庚申粵逆陷宜城迂伯沉淵死於贈  
聯洵無愧焉其同邑有諸生潘光序者字曉村性澹泊尠嗜好手  
一編寒暑不輟工古文詞與人交恂恂和藹發源齊梅麓太守彥  
槐贈聯云心地推忠厚長者頭銜習醉吟先生人以爲雅切  
道光間江陰陳九如字廉夫兩浙候補鹽運司運副性謹嚴喜施  
與歲值旱澇輒倡率平糶并捐鉅貲助賑全活者甚衆督學使者

福建廖公鴻荃聞其樂善不倦贈以聯曰爲善最樂豈望報乎積德必昌將有興者後其子果於咸豐癸丑登進士時同邑有吳景范字濟亨精倉公術治無不驗周孟木學使系英延其治疾因貽以楹語云得倉扁傳洞明五內精岐黃術名滿三吳

俞蔭甫編修樾壽李少荃中堂太夫人聯云起居八座亦多壽亦多男當百花生日祝慈蔭長春徧浙水東西洞庭南北文昌六星有上將有上相依萬石家聲承熙朝景運比荀龍滅二賈虎增三雖近雕琢却典切工新自是才人手筆又贈潘築巖茂才聯云門第舊金張喜宰相文孫剛配狀元嬌女偕隨小梁孟締百年嘉耦恰當十月陽春茂才爲相國潘文恭公之孫娶道光壬辰狀元吳崧甫侍郎之女十月初旬是其親迎成禮之吉日良辰也陳慶雲軍門贈曾滌生相國聯曰大將行師動若流水老臣謀國安如泰山頗貼切時有贈李少荃相國二聯作者未詳一係名儒名將名相壽身壽國壽民一係圖畫麒麟名第一精神龍馬日方中又曾相駐軍濟南時贈衍聖公孔觀堂先生祥珂楹語曰德備四科羣倫宗主學傳一貫累世通家亦要言不煩

張友山方伯官刑曹二十年出守秦申遷四川廉訪由廣東安徽方伯移姑蘇其母時年八十矣俞蔭甫編修樾獻聯爲壽句云慈雲從京國而來爲秦蜀皖粵諸大邦萬家生佛愛日至蘇臺更承與中丞廉訪兩賢母三壽作朋時丁雨生中丞應敏齋廉訪均有

壽母在堂朱績臣處士乃采孫孝廉之父年屆五十俞編修祝以  
聯曰有丹桂五株其大椿不老先元宵四日祝明月長圓處士正  
月十一日生有五子安徽張任菴名保衡以道光己酉舉於鄉庚  
戌成進士其嗣君瀚堂中翰名德霈以同治癸酉舉於鄉甲戌成  
進士俞編修撰偶語贈之云北山梓南山喬聯步到桂宮杏苑西  
年科戌年第成名占後甲先庚父子以酉戌聯捷科名佳話也  
德清俞蔭甫先生之文孫階青太史陞雲於光緒戊戌年以第三  
人入詞館先生已年逾七十口占兩聯以誌喜其一云念老夫畢  
世辛勤藏書數萬卷讀書數千卷著書數百卷喜小孫連番僥倖  
院試第一人鄉試第二人廷試第三人其二云湖山戀我我戀湖  
山然老夫耄矣科第重人人重科第願吾孫勉之余友倭翔千明  
經撰句賀其門人陸耀星秋捷云文字豈無憑看明年聯步而登  
蜚聲殿陛科名等閒事願異日不忘所學繼美忠宣又見楊章甫  
明經賀其門人許儀亭秋捷聯曰積善之家有餘慶行看志遂顯  
揚常此書生本色年少登科匪不幸惟望功深學養蔚爲公輔長  
材均有勸勉意

番禺潘仲瑜太史館選後歸里其兄椒堂太史撰聯云紫荆樹底  
拜下紅氍三千里芸館馳歸北向好行前輩禮春草池邊夢回青  
瑣十五載蓬山早到西堂還見阿連來又是科殿撰爲張建勛潘  
椒堂太史門下士也故又撰聯曰隔歲晉冰銜前度杏花馳馬足



同年稽齒錄阿兄桃李是龍頭青雲書院山長某君作偶語賀梁  
斗南大魁句云齧背唱先聲三千級引無雙士龍頭承舊澤百二  
年來又一人莊有蒸乾隆己未科廣州府番禺人梁耀樞同治辛  
未科廣州府順德人係同府故下聯云然

侯季舫觀察晟又號霽舫爲紀之先生胞弟任湖南寶慶知府晉  
雲南迤南道某年八秩誕辰稱觴丁植卿孝廉作楹帖云歐陽公  
穎上歸田載酒躋堂猶帶洞庭春色諸葛君南中籌筆持旌按部  
難忘洱海秋風筆意挺拔灑脫先數年侯紀之先生八十介壽時  
有某祝以聯曰年登八秩身列五朝看令子文孫簪笏一堂齊戲  
彩昔奏風琴今聲教鐸快杭民淮士冠裳兩地共稱觴風琴教鐸  
二句指浙江安吉知縣改山陽教諭而言也丁孝廉亦撰偶句以  
祝云八十齡少壯精神兒事追隨歸權難忘潞水北廿五科文章  
耆宿民情愛戴憇棠徧咏浙江西開口便侷儻丁公於楹聯可謂  
擅長秦霖士御史廣彤亦有壽紀之先生一聯句云績學著循良  
聲天錫純嘏杖朝增鄉國望人祝期頤亦切合

廣東東莞陳子礪申解元其業師陳蘭甫作偶語賀之曰文章高  
過羅浮頂科第連登會狀元子礪名伯陶後於光緒壬辰科廷試  
第三人及第羅浮二山在東莞余友陶丹翼中會元裘葆良孝廉  
廷梁撰聯賀之曰禮樂傳家詩書繼美羣賢領袖盛世羽儀丹翼  
名世鳳余業師表母舅雲組先生之子自幼秉庭訓刻苦勵學其

冠南宮洵無愧焉逾數年江陰夏閏枝編修孫桐贈楹聯云先生南  
有道東林繼聲更聞德曜高風畫裏溪山齊眉偕隱令子象賢南  
宮首舉移贈徐陵舊句郡中科第周甲又逢跋云雲組老伯耆儒  
碩德辭官歸里主講東林書院茲暨德配秦恭人並壽登七秩丹  
翼駕部官京師開筵遙祝桐預躋堂之列憶道光戊戌吾祖爲會  
大父母稱觴徐星伯先生贈聯有教子南宮第一人之句今適歲  
紀一周後先相繼足爲鄉國嘉話謹獻俚語用佐侑樽暨陽夏孫  
桐撰句并識

黎方流孝廉如璋爲從弟召民登鄉榜謁祖題楹帖云兄亦兼師  
鳳樓期弱弟添修爲戀春暉萬里公車遲就道母原爲傳蟾窟看  
孤兒翔步轉思冬夜一燈子舍勉傳經孫勗三茂才撰偶語賀侯  
景文孝廉昆仲同登鄉榜云果然是賢弟兄一時同慶登龍萱草  
登榮新雨露不愧爲真學問他日長安走馬杏花重見宋郊祁又  
張筱亭明經作賀聯曰大蘇品學能傳弟小宋科名不讓兄蓋言  
蔚人孝廉中經魁第九且曾受業於兄也

錢塘丁修甫中翰立誠作偶語賀汪星齋重遊泮水云八十杖朝  
年領袖泮宮采芹藻重三修禊節琴尊潭水問桃花時屆上巳桃  
花正盛開吾邑吳芻青廣文汝渤曾隨裕中丞幕府參酌機宜以  
功得藍翎五品銜爲金山縣訓導光緒壬午重遊泮宮某明經撰  
楹帖賀之句云秉鐸歷三朝師道今看還弟道稱觴逾八秩養庠

且喜復遊庠某縣蔡白香孝廉重諧花燭宜豐滌筱甫賀以聯曰  
而翁本是美男子阿婆學作新娘人至重諧花燭必年在八十  
左右殊非易事洵嘉話也

南通州顧君曾烜宦遊陝西年老辭職家居其西席楊某作偶語  
贈之云游宦歷秦漢故都垂老告歸接踵科名聲望厚有子播龔  
黃政績辭官養志等身著作校讎精劉緝庭補授訓導以其官推  
贈父母告祭先靈卽以是日爲長公子舉行嘉禮顧君曾烜爲題  
聯云天子推恩人臣克致於所生一命榮親題主焚黃循故事先  
王制禮丈夫願爲之有室百年合偶筮寶納采舉嘉儀族兄殿珍  
大令七十續娶華子隨孝廉撰楹帖賀之云此事誠古希解組在  
七旬續膠亦七旬白髮紅顏洵嘉耦爲君可預祝今日合百歲他  
年各百歲芝蘭玉樹定成行兄原配華沒已十七八年擬不再娶  
自甘肅渭源縣解組歸忽羨好逑遂娶小四十齡之朱氏女爲繼  
室汪寶素茂才賀丁柘軒完姻有堂上白頭千日醉案前紅燭十  
分春之句又代顧德三贈姪女梁蓬峰夫人有伯鸞曾作移家客  
道韞能爲咏絮詩之句許達夫醫士迎新婿楊某於家設宴款待  
孫勗三茂才撰聯申賀云入座春風楊得意前身明月許飛瓊典  
切意賅洵是才人之筆

合肥李相國五十壽其門下士撰楹帖祝云名將相惟我公公望  
公才整頓乾坤憑隻手大富貴必得壽壽身壽世歡呼華裔重龐

眉吾邑王綺石先生蕙林夫婦五十雙壽其弟八月先生芝林著  
聯祝云花時已三千年果時又三千年我以斯言爲兄嫂壽今日  
合一百歲異日各一百歲倘如所願誠家庭歡質樸老當是家庭  
壽言侯景文世丈作偶語壽薛母顧太夫人曰三鳳倍河東桂籍  
留名曾與郊祁同譜九龍環郭北椒盤介壽羣推桓孟家風太夫  
人令子六人登科者三其長子撫屏中丞官聲卓著醫理尤精時  
有贈中丞三聯一李文忠公句云醫國大名公領袖經天偉業此  
權輿一丁子美貢士句云龍虎豹六韜在手曾李左三相爭名一  
章定安大令句云將相經綸儒氣象英雄肝膽佛心腸又丁植卿  
孝廉壽其太夫人聯曰兩世紀羣交正欣晝錦筵開壽母令妻歌

魯頌六珈鍾郝望難得宮袍綵舞二難四美邁燕山頌工切  
孫戩宜刺史應穀九十稱觴吳春坪師撰楹帖祝之云騷客降庚  
寅滇南宦望江左高門累葉爭傳壽者相名場周甲子鶴算九旬  
鹿鳴兩宴連枝共見老人星由舉人爲雲南河西知縣旋調賓州  
知州咸豐癸丑重遊泮宮乙卯重宴鹿鳴享壽九十二余從叔祖  
母九秩開慶華子隨孝廉壽以聯云曰老曰耄日期頤開百歲筵  
爲熙朝人瑞多福多壽多男子符三祝願效聖世華封薛芸楣茂  
才之父年屆八旬其族姪渭占明經贈以聯云頌禱有同心問河  
東眉壽誰高合一族咸尊上齒曾元羣繞膝看堂北耳孫繼起再  
廿年其祝期頤切薛姓并確是族中前輩





雲間許幻園雅負時望相推許者多以楹帖見惠毛華孫有非書  
不坐惟酒爲涯之聯李漱筒有隱居求志閉戶著書之聯張蒲友  
有酒腸寬似海詩膽大於天之聯張子仙有讀書破萬卷落筆超  
羣英之聯劉康侯贈句云好學深思推司馬氏從容長嘯憶臥龍  
岡張小樓贈句云好花四時明月千里遠山一角奇書滿牀沈齋  
叟贈句云景星慶雲祥麟威鳳醴泉芝草仙露明珠蔡小香贈句  
云佳句不嫌千遍讀識君翻恨十年遲均有風趣其人可見

吾鄉朱君達夫鑑章文章古奧不入時趨常熟楊濱石編修謂近  
日試官無人解得乃庚午科竟舉於鄉王仰之明經賀以聯云果  
有賞音吾黨久推異等豈無弋獲此材不愧賢書又楊子承先生  
昌祐余外舅也同於是科登賢書其弟子登先生亦昌之名下士  
時未獲售王明經撰賀聯曰一龍拏雲已變化三鳳指日將翱翔  
三鳳蓋指行三而言句法天矯天外倜儻不羣

吉林馬錦江離尹七秩稱觴楊筱荔觀察寄聯祝云恰先荷花十  
九日生清能益壽再看桃樹三千年實古更希逢六月二十四爲  
荷花生日六月初五是錦江誕辰引用貼切馬君久寓淮安其子  
孫入籍於此秦研樵封翁七十壽辰汪葆素茂才祝以偶語云玉  
樹祝遐齡汴水商山兩省謳歌賢邑宰錦囊編樂府庾清鮑俊七  
旬豐鑠老詩人工部主政榮詠叔太夫人於某年十月介七秩壽  
適其次子某遊庠王仰之明經撰楹帖賀之曰七十古來稀况坐



看大宋文章蛟騰鳳起九五福曰壽又脩到小春時節桃熟芹香  
丁植卿孝廉年屆古稀侯紀之大令祝以聯曰五斗米不肯折腰  
是何高蹈四十年憶曾同楫遙祝遐齡秦霖士太史屆杖國之歲  
楊明經鶴秋先生贈以楹語云祝耆齡人看桃李門前滿具仙骨  
君自蓬萊頂上來上聯切東林山長下聯切翰苑

杭州陳廉夫觀察遷居嘉興丁修甫中翰賀以聯曰七八月秋水  
生喜新居傍楊柳隄灣芝蘭室雅五百里德星聚選勝地在鴛鴦  
湖曲馴馬門高吳興劉翰怡京卿營上海新居落成湖南李亦萊  
撰偶語贈之句云所居與歐亞爲鄰漢瓦秦碑好古獨儲醫俗藥  
最難得春秋之富曹倉杜庫移家滿載饋貧糧吾邑鄒公子道平  
茂才自汴省歸以父宦囊構宅東河頭巷落成之日丁植卿孝廉  
贈聯云百萬青錢仁里卜鄰安且吉一雙白璧道鄉衍澤熾而昌  
里中有坊曰里仁爲美而公子與弟壽平茂才俱年少翩翩有璧  
人之目忠公之苗裔也故云然

曾文正公克復安慶張廉卿書楹帖詣賀云天子預開麟閣待相  
公新破蔡州回文正見之甚喜時幕中有言麟閣蔡州對仗未工  
者文正嘆曰以靈對靈尙何不工之有毘陵有老儒生鄒某年屆  
古稀作自嘲聯曰不佞佛不學仙計味在三餘僅留白屋無成名  
無就利愧年臻七袞仍坐青氈吾友王寄塵孝廉世忠居城南黃  
泥埕有六十自壽句云平生意氣謂何京國觀光燕臺懷古汴梁



載酒岱岳尋碑六十年回首前塵也思烈烈轟轟請繫長纓做个  
奇脚色顧我頽唐甚矣張蒼齒豁廉頗矢遺沈約形消江淹才盡  
一雙眼飽看世運祇得委委曲曲自搔短髮變成老頭陀舒寫懷  
抱筆曲而達張子惠副車文藻才學湛深有五十自壽句云自呱  
呱墮地以來爲俗子爲陋儒逐浪隨波枉教萬八千日過作蕩蕩  
樂天之想不驚名不馳利酣眠飽食那知四十九年非雖是謙詞  
却有逸趣有某屆五秩誕辰作聯懸於書室云虛度半百年華能  
知非庶幾寡過聊借三椽茅屋期無愧卽是廣居楊懶髻先生湘  
有自壽聯云半間老屋四扇明窗宏開壽宇一子行厨三孫醞酒  
以燕嘉賓先生心貌古樸作擎窠書道逸豪邁寒士之可敬者

李文忠公六秩壽辰廳懸楹帖云天生是爲社稷人望之若神仙  
作者未知又薛撫屏中丞撰五言聯曰壽恆河沙數仰天柱峯尊  
安徽有天柱山下聯用此典吾邑楊母侯太夫人七秩稱觴丁植  
卿孝廉祝以偶語曰富貴一生從父從夫從子恩榮三錫多福多  
壽多男夫人爲侯葉唐少宰之女楊菊仙大令之配藝芳方伯之  
母有子五人半皆印綬鄉里榮之是聯洵切合渾成吳芻青廣文  
亦贈有一聯覺稍遜句云五鳳啟家祥護閣恆春富貴十全今有  
幾三鱣仍世澤萊庭舞綵起居八座古尤稀楊明經鶴秋先生八  
旬介壽其門下士陳恩受寄聯遙祝云三載坐春風小子無才承  
乏西冷慙製錦八旬開壽宇長庚有耀願從北面佐稱觴曾姪孫



臨士觀察以楹帖祝云舉族仰儀型鞠膺登堂羅拜數雲祊而下  
達尊兼齒德養庠入學衆推在申伏之間丁孝廉亦有聯云講座  
瑞銜鱸桂馥蘭芬酌斗春從人日到文壇詞吐鳳椿榮萱茂躋堂  
客叩子雲居切姓發揮與上數聯各有意趣

慈利田東溪賀同邑友人李某武鄉試中式句云投筆自雄才可  
笑吾曹毛錐子竟安所用立功期馬上抗論先世飛將軍抑又何  
人徐仲山召試歸益都馮文毅贈以偶語云北闕上書識盡西京  
才子東軒賜食歸貽南國佳人仲山夫人商氏年近古稀容貌如  
二十餘好女朝夕惟飲乳汁猶耽花讀書不衰有李丹屐者里居  
未詳撰句賀甯元甫新居落成云晏平仲請更諸爽塏者范柏年  
所居在廉讓間劉伯持繼娶謝氏秦視樵明經作楹帖賀云延明  
衣奮乘龍座道韞詩題射雀屏妙在兩切其姓陳有珍祝某上將  
軍聯曰武緯文經南天半壁嵩生嶽降上將一星侯紀之大令作  
偶語祝吳芻青廣文云名重大僚曾倚文章資籌筆官非小隱聊  
將苜蓿當蟠桃指會隨裕中丞幕參酌一切

壽州孫文正相國誕辰于晦若侍郎撰楹句云壽州相國壽者相  
天子師傅天下師淵穆高雅恰如其人吾邑楊珍珊封翁花甲初  
周其子經笙秋闈報捷余外舅楊紫丞孝廉贈以聯曰是翁備箕  
疇五福其子歌鹿鳴三章楊望洲大令夫婦同壽其子蘭樵秋捷  
南闈外舅有贈聯曰輝曜雙星綿福德榜開三世紹箕裘三世開



榜而兼雙壽誠盛事也周仲克甥於醫學經驗宏多而眼料尤精察  
余贈聯曰仙手擎雲光明大放佛心濟世仁壽同登楊筱荔觀察  
七秩誕辰余祝以聯云勲績徧浙東西辭二千石鶴俸歸來而今  
高蹈芳踪夫婦齊眉舉鴻案文章驚江南北再十三年鹿鳴重宴  
且趁古稀華誕兒孫舞綵集鱸堂楊子延先生七秩稱觴裘葆良  
孝廉著楹句云翁絕似陶泉明只以菊花爲性命游何必赤松子  
能兼詩畫亦仙才又章定安大令撰聯云直疑靖節今親見尙有  
元方古益稀靖節指其高種菊元方指乃兄紫丞先生均切合

師竹廬聯話卷九終





中国国家图书馆  
NATIONAL LIBRARY OF CHINA